

愛日軒稿

一

350.9
S7741

序

好讀書而不求致用譬之玩物喪志求致用而習
為大言則又若趙括李元平以之傾座有餘一試
而躡矣何也彼特出於剽賊安在其能致用乎元
甫從予游二十年未嘗以經濟自詡余固無由識
之往年嘆夷抵江甯郡城中奸民將為亂鄉先達
暨諸公請於有司設九城保衛局乃得安帖有造
於吾郡甚大章程部署悉與兵法合久乃知其綿
絕於元甫因索觀初藁並得海防江防團練緝奸
諸議愈嘆其洞悉時勢籌畫詳盡而未得盡其用



也元甫幼侍先德仕江浙間飲聞兵法於前明戚
南塘破倭寇處多所身歷得其形勢以證機宜又
善讀父書其不同於經生之迂策士之夸也宜哉
元甫既孤事母以孝聞今以孝廉出為令需次皖
江其能為賢令不待言由此而盡展所抱毓為時
棟余能無望也哉時

道光二十五年秋八月馬沅序

序

吾宗元甫博學多才居恒言行恂恂有儒者氣象
與之抗論古今事理得失則閱肆博辯動中肯要
壬寅歲六月江甯有夷警元甫首倡議為保衛草
具章程十八條致余與蔡太僕言於大府采其說
率里人舉行之其後夷情就撫省城安堵無恙諸
大府所以籌

國保民者計慮至深遠然當夷船壓境時居民驚惶
徙避宵小乘間肆攘掠賴城中集民夫鱗次櫛比
四十里內擊柝之聲相聞奸民強敵無所窺伺迄

二閱月而閭閻無雞鳴犬吠之警則保衛亦非無助也維時司厥事者殫力瘁心晝夜無稍懈咸為眾所共稱而不知倡為是議之出於元甫也以曲突徙薪之說例之元甫之有功於里閭不亦偉歟今元甫以大挑得縣令需次於皖乃綴緝前代道學循吏合為一編意以古之儒者未嘗有無本之治術其所見諸設施者固非平日躬行心得之所儲而發也編輯未半持以示余余謂元甫雖未獲綰符綬躬治簿書以勤撫字而設心靳為有體有用之學於是編可見矣他日宰繁劇歷川郡洊膺

牧伯之任皆務為保障無為繭絲即以是編為治
譜可也

道光歲在乙巳秋七月石生周開麒序

代序

許海秋蘭臺書

元甫仁兄足下濶別逾三十年無緣展奉不知何時携手一豁悵惘無似卽君來京師奉讀

賜書並

示大著愛日軒藁一冊蓋於當世之故洞悉其得失行間言下殊有亭林意色若充類而見於用則亦幾幾乎張太岳一輩人必非空譚不根一試輒窮者之所知而所議江海之防則尤讀之而慨然也居嘗反復漢班固匈奴傳贊晉江統徙戎論與

夫宋李忠定上道君太上皇帝封事為之痛恨時
時不以去諸心今乃觀

足下文將一發其狂愚之論而有所不敢顧聞馮
唐與論將帥喟然歎息思古名臣勢既不能而犬
馬肥充則有噬齧獨奈何不如忠定所言使在我
者理直而有備亦庶幾收之桑榆之計乎儒者立
言當求有濟

足下文其有以鑒於此而宗衡益深慚好為高論
而無以既乎其實也閒官無事尚可讀書惟自知
性嬾近且多病

大著屬為序一時不能報

命即以此書附諸卷末太冲之文必傳或無俟藉
重於元晏也許宗衡啟

序

余讀班固漢書藝文志傳曰登高能賦可以為大
夫余竊疑之虞書曰日宣三德夙夜浚明有家豈
區區能賦之謂哉及閱毛傳卜云其吉注升高能
賦師旅能誓山川能說歷歷言之有九謂君子能
此九者可謂有德音可以為大夫始釋其疑韓詩
外傳云孔子游於景山之上孔子曰君子登高必
賦蓋賦亦六義之一也余年二十識元甫元甫少
時賦名噪甚以孝廉宦遊於皖不相見者二十餘
年咸豐己未遇於吳門朝夕恆相見余嘗夢神人

語余曰人心不悔禍行將玉石俱焚矣後果驗語
詳元甫紀夢徵信文中集內海防江防諸議所以
籌畫者至周且密可不謂之師旅能誓者歟至皖
省便覽一書其於山川詳哉言之矣其文和平不
噍殺不可謂非德音也人以元甫有大夫才未竟
用為惜韓詩外傳不云乎名號傳於世者不待勢
位而顯其元甫之謂歟元甫亦何憾也哉朴菴楊
長年識

題詞

伏讀

大著擘畫周詳透切具見實心濟用之方當時行之
已一一見功可知非此紙上空文祇供愛素傳誦
而已文字尤簡括堅栗無一譌言長語允宜採入
皇朝經世文編永為治譜不止為一時一地言也石生
湘帆二序亦發皇中窾非阿私泛譽也欽服無量
丁未六月桐城治弟方東樹識

跋

吾人不患不能讀書患讀書而不知世務不知世務則泥於古者窒於今其無濟於世與不讀書者等吾鄉周元甫余久知其名乙巳冬遇於濠上其氣恬然其神穆然知其為君子人然數語即別去未能窺其底蘊也次年余過桐城於史穎生處見之亦數語別丁未夏再見於桐城與坐竟日少所語出示所著皖遊便覽知其留心世務矣尚未能知其讀書之深淺也戊申夏余來守皖郡乞元甫襄讞事由是朝夕與共始知其書無不讀世務無

道光二十九年歲次己酉七月既望張錫蕃跋於安慶
郡廨之端本堂

愛日軒彙本目錄

海防末議

江防末議

寧省保衛通議章程

遠徵調不如近團練議

緝漢奸莫如復保甲說

和議章制啟

村鄉連禁啟

東南時議八條

甯垣善后急務三條

請救護被擄婦女嬰弱並寬免脅從呈

甯垣善后首務四條

請教習難民紡織稟

紀夢徵信

會匪紀聞

皖城失陷紀畧

安撫蔣公文慶死事紀實

求卹難生啟

愛日軒稿

金陵元甫周葆元稿

海防末議

自來言海防者必曰防之於海毋使登岸誠當時不易之論而今昔情形則迥然相反如倭船之見於載籍者直曰形制卑隘遇巨艦難於仰攻而苦於犁沈故廣福各船皆其所畏是其船之小於我可見又曰倭長於舞刀而短於砲火一經登岸則人自為戰其刀不可當故必乘之於海犁以大船感以砲火是其砲火之不及我可見至蔡牽各艘則號曰艇匪又必藉資內地接濟硝